

2 तेसलोनि

तेसलोनि विस्वासुल्कुंक पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 50-54

इद सिट्टि पौलुस रासतद आंदु. पौलुस तेसलोनि सहरता विस्वासुल्कुंक मोदाटा सिट्टि रासता कोन्नि रोजकुना पजा, अगाटा विस्वासुल्कुना लोप्पो पूना परिस्तिति सुस्व आता. अद बतल इत्ते, “सामि मल्सि वायाना रोजु वाता” इंचि रासतदुन ओर बच्चुंगो तीरकुना अर्ताल्कु तेंडालय दल्गतुर. इच्चुर लोक्कुनद सामिना न्यायम सुस्व आता इंचि ओरा विचारम मत्ता. अदुनहाटी दुनिया मुळगाना वेला दग्गेरेने मंता इंचि कबळ कियाकोंटा, ओर लंडु आसि मनुंदुर.

इसोंटा तप्पुड विचाराल्क, ओरा मनसुनाल तेंडसि पोहालय पौलुस तेसलोनि सहरता विस्वासुल्कुंक रोंडो सिट्टि रासतोर. अल्हेने, “सामि मल्सि वायाना रोजु वाता” इंचि इच्चुर इनुंदुर, अद पोल्ले ओर्क बेस तेळियागोम इंचि पौलुस इद सिट्टि रासतोर.

बगा बतल मंता

जोहार आनि परिचयम 1:1-2

स्तुति आनि आदेसाल्क 1:3-12

किरिस्तु मर्रा वायना बारेमते समजांचि वेहामळ 2:1-17

किरिस्तु वेहताप पिस्साना बारेमता बोदां 3:1-15

आकिरता बोदां 3:16-18

जोहार

1-2 नना पौलुस,* सिल्वानुस आनि तिमोति मोमोट इद सिट्टि मीकु तेसलोनि सहरते मंदना कलिसियातोरुक्क रासेक मंतोम. मना पेनबाबाल आनि सामि येसु किरिस्तुनाहेंदाल कुर्पा, सांति दोर्किकांटी.

* 1:1-2 इद सिट्टि पौलुस रासतोर, सिल्वानुस आनि तिमोति ओनतोन नमस्कारम वेहतुर.

तेसलोनि विस्वासुल्कुना विस्वासम आनि पिस्वर

3 विस्वासुल्कुनिटा! मीवा विस्वासम वेल्ले बेरस्सेक मंता, मिमेट वरोन-वरोर कीकुनना पावरम वेल्ले बेरस्सेक मंता. अदुनहाटीं मोमोट बस्केळक मीवा बारेमते पेनदुक दन्यवाद कियमळ गावाले. इदे बरोबर मंता.

4 अचोने आयाका मिमेट तकलिपकुन, बादन ओप्के पीसि पेनदा लोप्पो गट्टिगा विस्वासमते निल्लि मंतिर. अदुनहाटीं मोमोट मीवा बारेमते पेनदा कलिसियाने पेद्दातनम वेहकुंचेके मंतोम.

5 इद पेनदा सत्तेम न्यायमता रूजुव आंदु. मिमेट पेनदा राज्येमते होननालायक आयागोम इंचि इवन्नि बादां अरसेक मंतिर.

6 बोर अय्ते मीकुन तकलिप कीतुर, दानकु बदुल पेन ओर्क तकलिप हियमळ न्यायमे आंद.

7 बस्के अय्ते सामि येसु ओना बलमगल्ला दूतनतोनि पोत्तना तळमिटे स्वर्गमताल दिस्सानुर, अस्के तकलिपते मत्तोर्कुंक आनि माकु सांति हियानुर.

8 बोर अय्ते पेनदुन एरपाट किय्युर, बोर अय्ते मना सामि येसुना बेसता कबुरतुन पीसि ताकुर, ओर्क पेन सिक्सा हिय्यार.

9 ओर सामिना मुन्नेटाल आनि ओना ताकतता महिमाताल लक्कु आसि ओर्क बस्केळक मनना नासुडेमता सिक्सा आयार.

10 बस्के अय्ते येसु सामि मर्रा वायानुर अस्के ओना पवित्र लोकुल्कुनाहेंदाल महिमा एतंतोर आनि विस्वासम कीतुर अंतोराहेंदाल ओर पेद्दातनम दोर्किचकुंतोर. बारित्ते मोमोट वेहता गवाइतुन मिमेट विस्वासम कीतिट.

11 इदुनहाटीं, मना पेन मीकुन बताहाटीं अय्ते केयता अदुनलायक मिमेट मनालय, अन्नि बेसता कबाहक पूरा कियालय आनि विस्वासमतव पूरा कबाहक पेनदा ताकततोनि पूरा आयालय मोमोट मीवाहाटीं बस्केळक पारतना कीसेके मंतोम.

12 इल्हा मना पेन आनि मना सामि येसु किरिस्तुना कुर्पातुन पीसि, मीवाहेंदाल मना येसु सामिना पोरोल्क कदर दोर्काना आनि ओनहेंदाल मीक कदर दोर्काना.

2

सेड्डा पोल्लें जर्गतां

1 विस्वासुल्कुनिटा! इंदके मना सामि येसु किरिस्तु मर्रा वायाना बारेमते, आनि मनम जमा आसि ओनतोनि कलियाना बारेमते मीक विनंति कीसेके मंतोम.

2 अद बतल इत्ते, सामि मल्लिस वायाना रोजु वाता इंचि मिमेट आत्माताहेंदाल* आयि, पोल्लेताहेंदाल आयि, मावाहेंदाले सिट्टि वाता इत्ताप आयि मीक केंजा वाते, मीवा मनसुन हीके-हेके आया हियमट, वेरियमट.

3 बोरे आयिर बदे रीतुने मीकुन दोका किया हियमट; बारित्ते मुन्ने वरोना पोल्ले वरोर केंजाकोटा आयाना कालम वायार, पजा पेनदा पोल्लेतुन विरोद कियाना नासडेमता मर्रि दिस्सानुर, दाना पजाने किरिस्तु मर्रा वायाना रोजु वायार.

4 आ नासडेमता मर्रि, पेन इंचि इनानवुन अन्निन, मनकालोर मोळकानवुन अन्निन विरोद कीसि, ओनद ओरे पेद्दोन इंचि वेहकुंतोर. ओर पेनदालेसीं पेनदा गुळिते होंचि उद्दानुर, आनि ननाने पेनदुन इंचि वेहकुनानुर.

5 नना मीवातोनि मत्तस्के इव पोल्ले वेहतन, मीक मति हिल्लेना?

6 पेनदा पोल्लेक विरोदमते तिरियानोर ओना वेला वातारित्तेन दिस्सानुर, इंदके ओन बतल आपसेके मंतानो मीक एरपाटे मंता.

7 पेनदा पोल्लेतुन विरोद कियानोना मर्ममता ताकत इंदकेगुडा कबळ कीसेकेन मंता; गानि दान आपानोन पक्कक कियानादाका पेन ओन आपसेकेने मनंता.

8 बस्के अय्ते पेनदा पोल्लेतुन विरोद कियानोर दिस्सानुर, अस्के येसु सामि ओना तोळ्दा ऊपरिते ओन हळ्किसि, ओर वायानेके दिस्सना वेलगुने ओन नासडेम कियानुर.

9 पेनदा पोल्लेतुन विरोद कियानोर वायमळ इत्ते, देय्यमतदे उंदि कबळ आंदु, ओर वासि आबद्दम पोल्लेने देय्यमतव अन्नि ताकतकुनतोनि चिन्हां, इचंन्रमता कबाहक कियानुर.

10 पजा कराब कबाहक कीसि नासडेम आयानोर्कुन अन्नि तीस्कुने पसांचंतोर. बारित्ते बद सत्तेमतुन अय्ते पावरमते ओप्कुंचि मत्ते मुक्ति दोर्किस मनवळ, ओर अदुन ओप्पकुन्ना हिल्लुर.

11 अदुनहाटी ओर आबद्दमतुने विस्वासम कियिरि इंचि पेन ओरा लोप्पो गयबेत कियाना सक्तितुन लोहंता.

12 बचुदुर अय्ते सत्तेम पोल्लेतुन विस्वासम कियवा, कराब कबाहकुने कूस आंतुर, ओर अंतोर्के पेन सिक्साता आदेस हिय्यार.

13 सामिना पावरमगल्ला विस्वासुल्कुनिटा! मिमेट पवित्र आत्माताहेंदाल पवित्र आसि, सत्तेमते विस्वासम ईसिं पिसालय पेन मीकुन मुन्नेने पेरता. अदुनहाटीं माकु मीवा बारेमते पेनदुक बस्केळ्ळक दन्यवाद कियमळ गावाले.

* 2:2 आत्माता बविस्वयानि.

14 इल्हा मिमेट मना सामि येसु किरिस्तुना महिमातुन दोर्किच्छुकुनना इंचि, पेन मोमोट वेहता बेसता कबुरताहेंदाल मीकुन केयता.

15 अदुनहाटीं विस्वासुल्कुनिटा! गट्टिगा निल्सि मंटु, मावा तोळदाल पेयसता पोल्लेहेंदाल, सिट्टिताल बव रीति-रिवाजकु अय्ते मीक कराहतोम अवुन पीसि ताकट.

16 मना सामि येसु किरिस्तु आनि पेनबाबाल मनाकुन पावरम कीसि, ओना कुर्पहेंदाल बस्केळ्ळ मनना सांति, बेसता आसे हीतो.

17 मीवा हरेक बेस कबळते, हरेक पोल्लेते पेन मीकुन गट्टिगा कियिकांटी, इंका मीवा मनसुने सांति हियिकांटी.

3

माहाटीं पारतना कीम्टु

1 विस्वासुल्कुनिटा! मीक आकिरते वेहानद बतल इत्ते, सामिना पोल्ले मीलोप्पो पैलांचतापे, वेरेतोरा लोप्पोगुडा बिराना पैलांचि पेद्दातनम दोर्कनाहाटीं पारतना कीम्टु.

2 अल्हेने अंटोर लोकुल्क विस्वासुल्क आयुर, अदुनहाटीं तेडा आनि दुस्त लोकुल्कुनाल पेन माकुन पिसागोट्टि.

3 गानि सामि विस्वासमगल्लोड आंदुर; ओर मीकुन देय्यमता कयदाल कापाळसि गट्टिगा निलाहंतोर.

4 मोमोट आदेस हीताप मिमेट ताकसेके मंतिट. मुन्नेगुडा अल्हे ताकंतिर इंचि सामिन लोप्पो माक मीवा बारेमते बरोसा मंता.

5 सामि मीवा मनसुकुन पेनदा पावरमते अल्हेने किरिस्तुना गट्टि ओप्केते ताकसा परांतोर.

जिम्मेदारिते कबळ किय्याना

6 विस्वासुल्कुनिटा! बोर अय्ते लंडु आसि मंतुर, मोमोट वेहता रीति-रिवाज परकारम ताकसेक हिल्लुर, असोटा हरेक मनकानाल लक्कु मंटु इंचि मना सामि येसु किरिस्तुना पोरोलते मीक आदेस हीसेक मंतोम.

7 मोमोट मीवातोनि मत्तस्के लंडु आसि मना हिल्लोम, अदुनहाटीं मालेसीं बल्हा ताकाना इंचि मीक कुद एरपाटे मंता.

8 मोमोट बोनगागुडा पुक्कटता गाटो तिना हिल्लोम, मी लोप्पोटाल बोनके बर्बु आयामन्नि इंचि नर्का-पिय्यल कबळ, कस्टम कीसि गाटो तित्तोम.

9 माक मीपोरोर् बर्वु आयाना अदिकारम हिल्ले इत्ताप आयो, गानि मिमेटगुडा मावालेसीं मंदना इंचि मीक हुप्सालय मोमोट कबळ कीसि तिल्लोम.

10 मोमोट मीवातोनि मत्तस्के, “बोर्कन्नागिटा कबळ कियानद हिलाकोटे, ओर गाटो तिनामन्नि” इंचि आदेस हीसि मत्तोम.

11 गानि मिहगा इच्चुर लोकुल्क लंडोर्क मंतुर, ओर बतले कबळ किय्युर, सिराप इंकावरोना जोलिक होनना कबाहक कीसेके मनंतुर इंचि मोमोट केंजतोम.

12 असोटा लोकुल्क चुपचाप कबळ कीसि ओरा पिस्वरता कमाइ कियिरकांटी, ओर्क मोमोट सामि येसु किरिस्तुना पोरोलते आदेस हीसि, बुद्दि वेहंतोम.

13 विस्वासुल्कुनिटा! मिमेट बेसता कबाहकुने नेरबळताप मनमट.

14 बोर्न्नागिटा इद सिट्टिते रासता पोल्लेन केंजसि ताकाकोटे, ओनपोरोर् नदर इराट, ओनकु सिग्गु वायागोम इंचि ओनतोनि दंटा पियमट.

15 अयना ओन पगातोन्लेसीं हळमट, गानि तम्मुनालेसीं ओन्क वेरे वेहाट.

आकिरता पोल्लें

16 कुद सांति हियना सामि, बस्केळ्क अन्नि तीस्कुने मीक सांति हियिर, बस्केळ्क मी अंतोरतोनि मन्निरकांटी.

17 नना पौलुसुन आंदुन, नावा कयदेने मीक जोहार रासेक मंतन. अन्नि सिट्टिने इद नावा आनवल आंद, नना इल्हे रासंतन.

18 मना सामि येसु किरिस्तुना कुर्पा मी अंतोरतोनि मन्निरकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068